

張仲景傷寒論貫珠集目錄卷六

辨列太陰條例大意

太陰諸法 計十條 方二道

太陰藏病脈證治六條

桂枝加芍藥湯方

桂枝加大黃湯方

太陰經病證治二條

太陰經藏俱病證治一條

太陰病愈期一條



張仲景傷寒貫珠集卷之六

飲鶴山人尤怡在涇註

二然朱陶性校

太陰篇

辨列太陰條例大意

太陰者土也在臟為脾在氣為濕傷寒傳經之熱入而與濕相搏則為腹滿吐利等證直中之寒入而與濕相搏亦為腹滿吐利等證但有肢冷肢溫脈遲脈數口渴不渴之異耳又三陰為三陽之裏而三陰亦自有表裏是以風寒所中不必盡入於臟而亦留連於經故有太陰中風之條與桂枝發汗之法又下利腹脹滿身體疼痛者此為經臟俱病之證故與先裏先表之法乃今之論三陰者但云直中傳經而已是知有三陰之裏不知有三陰之表也茲篇先列臟病次列經病又次為經臟俱病凡十條為一卷

太陰諸法

太陰藏病脈證治六條

太陰之為病腹滿而吐食不下自利益甚時腹自痛若下之必胸下結鞭

此是太陰病之的證也太陰之脈入腹屬脾絡胃上膈俠咽故其病有腹滿而吐食不下自利腹痛等證然太陰為病不特傳經如是即直中亦如是且不特傷寒

傷寒貫珠集

卷六

總辨 太陰諸法

一 上海千頃堂印行

如是即雜病亦如是但有屬陰屬陽為盛為虛之分耳而太陰者藏也滿而不實法不可下若下之則胸下結鞭中氣傷者邪氣必結也

本太陽病醫反下之因而腹滿時痛者屬太陰也桂枝加芍藥湯主之

病在太陽不與解表而反攻裏因而邪氣乘虛陷入太陰之位為腹滿而時痛陶氏所謂誤下傳者是也夫病因邪陷而來者必得邪解而後愈而藏陰為藥所傷者亦必以藥和之而後安故須桂枝加芍藥湯主之桂枝所以越外入之芍藥所以安傷下之陰也按金匱云傷寒陽脈濇陰脈弦法當腹中急痛者與小建中湯不差者與小柴胡湯此亦邪陷陰中之故而桂枝加芍藥亦小建中之意不用膠飴者以其腹滿不欲更以甘味增滿耳

桂枝加芍藥湯方

於桂枝湯方內更加芍藥三兩隨前共六兩餘依桂枝湯法

大實痛者桂枝加大黃湯主之

此承上條而言腹滿而未實痛而不甚者可以桂枝加芍藥和而解之若大實大痛者邪氣成聚必以桂枝加大黃越陷邪而去實滯也夫太陰脾藏也藏何以能實而可下陽明者太陰之表以膜相連臟受邪而府不行則實故脾非自實也因胃實而實也大黃所以下胃豈以下脾哉少陰厥陰亦有用承氣法詳見各篇所當互考

桂枝加大黃湯方

桂枝三兩去皮 甘草三兩炙 大黃一兩

生薑三兩切 大棗十二枚 芍藥六兩

右六味以水七升煮取三升去滓溫服一升日三服

太陰病脈弱其人續自便利設當行大黃芍藥者宜減之以其人胃氣弱易動故也此亦承上條而言大黃芍藥之得以用者為其胃實而便堅也若其人脈弱續自便利則雖有大實痛證此法不可用矣即欲用之亦宜量減而與之所以然者胃氣弱而不振邪氣不聚而易動故可以緩圖而難以峻攻也

傷寒脈浮而緩手足自溫者是為繫在太陰太陰者身當發黃若小便自利者不能發黃至七八日暴煩下利日十餘行必自止以脾家實臟府當去故也

傷寒脈浮而緩者脈緊去而成緩為寒欲變熱之證如太陽第四十七條之例也手足自溫非太陰定證見太陰有寒手足必寒有熱手足乃自溫耳又陽明受熱則一身及手足熱太陰則身不熱而手足溫茲寒已變熱而手足自溫則傷寒之邪不之陽明而之太陰而其脈仍浮則其邪亦未盡入故曰繫在太陰謂以太陽而內連太陰也於法太陰受熱而汗不出者熱與濕搏當發身黃若小便自利者其熱得通不能蒸鬱為黃矣至七八日暴煩下利者正氣內作邪氣欲去也雖日

十餘行繼必自止所以然者脾家本有穢腐當去故為自利穢腐盡則利亦必自止矣

自利不渴者屬太陰以其藏有寒故也當溫之宜四逆輩

自利不渴者太陰本自有寒而陰邪又中之也日屬太陰其藏有寒明非陽經下利及傳經熱病之比法當溫藏祛寒如四逆湯之類不可更以苦寒堅之清之如黃芩湯之例也

太陰經病證治二條

太陰中風四肢煩疼陽微陰濇而長者為欲愈

此太陰自中風邪之證不從陽經來也夫太陰脾也風陽邪也脾主行氣于四肢而風淫為末疾故太陰中風四肢煩熱而疼痛也脈陽微陰濇而長者陽無病而陰受邪而濇又為邪氣之將衰長為正氣之方盛正盛邪衰故為欲愈

太陰病脈浮者可發汗宜桂枝湯

太陰脈浮有二義或風邪中于太陰之經其脈則浮或從陽經轉入太陰旋復反而之陽者其脈亦浮浮者病在經也凡陰病在藏者宜溫在經者則宜汗如少陰之麻黃附子細辛厥陰之麻黃升麻皆是桂枝湯甘辛入陰故亦能發散太陰之邪也

太陰經藏俱病一條

下利腹脹滿身體疼痛者先溫其裏乃攻其表溫裏宜四逆湯攻表宜桂枝湯此條叔和本列厥陰篇中今移置此

此太陰經藏並受寒邪之證叔和編入厥陰經中者誤也下利腹脹滿裏有寒也身體疼痛表有寒也然必先溫其裏而後攻其表所以然者藏氣不充則外攻無力陽氣外泄則裏寒轉增自然之勢也而四逆用生附則寓發散于溫補之中桂枝有甘芍則兼固裏于散邪之內用法之精如此

太陰病愈期一條

太陰病欲解時從亥至丑止

六經邪解之時必于其經王之時太陰者土也土王於辰戌丑未而獨于亥子丑時解者脾為陰土應壬子陰故其病欲解必從亥至丑上也



張仲景傷寒論貫珠集卷之七

飲鶴山人尤怡在涇註

二然朱陶性校

少陰篇

論列少陰條例大意

少陰為太陽之裏居厥太二陰之間故有邪在太陽而已內及少陰者有寒中少陰而仍外連太陽者有邪在少陰而或兼厥陰或兼太陰者大抵連太陰者多發熱連厥陰者多厥利也是傳經直中之外又有不同如此且也直中之寒久亦化熱傳經之熱極必生陰茲篇先列脈證于前次清法次溫法又次為生死法欲學者明辨宜清宜溫之實不必但泥傳經直中之名也又其次為少陰病禁以少陰為汗下之例亦不得不著汗下之禁云凡四十五條為一卷

少陰諸法

少陰脈證四條

少陰之為病脈微細但欲寐也

經脈陽淺而陰深陽大而陰小邪傳少陰則脈之浮者轉為微大者轉為細也又多陽者多寤多陰者多寐邪傳少陰則目不瞑者轉而為但欲寐也夫少陰者三陰之樞也陽於是乎入而陰于是乎出故雖太陰厥陰同為陰藏而其為病實惟

少陰為然而少陰之為病亦非獨脈微細但欲寐二端仲景特舉此者以為從陽入陰之際其脈證變見有如此

少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

此少陰自受寒邪之證不從陽經來也寒初到經欲受不可欲却不能故欲吐不吐心煩但欲寐而實不能寐也至五六日自利而渴則其邪已入少陰之藏矣然少陰陰藏也寒陰邪也以陰受陰法當不渴而渴者此非有熱以藏虛故引水自救耳更審其小便若色白者則少陰寒病全體大露無疑何以言之熱傳少陰自利而渴者邪熱足以消水其小便色必赤寒中少陰自利而渴者雖能飲而不能制其小便色必白也仲景辨證之精如此

病人脈陰陽俱緊反汗出者亡陽也此屬少陰法當咽痛而復吐利

陰陽俱緊太陽傷寒之脈也法當無汗而反汗出者表虛亡陽其病不屬太陽而屬少陰矣少陰之脈上膈循喉嚨少陰之藏為胃之關為二陰之司寒邪直入經藏俱受故當咽痛而吐利也此為寒傷太陽陽虛不任因遂轉入少陰之證蓋太陽者少陰之表猶唇齒也唇亡則齒寒陽亡則陰及故曰少陰之邪從太陽飛渡者多也

少陰病八九日一身手足盡熱者以熱在膀胱必便血也

此熱傳少陰而復還入膀胱之證膀胱者太陽也太陽為三陽之表而多血少氣熱在膀胱則一身手足盡熱而熱氣有餘血為熱迫散而下行則必便血也

少陰清法七條

少陰病得之二三日以上心中煩不得卧黃連阿膠湯主之

少陰之熱有從陽經傳入者亦有自受寒邪久而變熱者曰二三日以上謂自二日至五六日或八九日寒極而變熱也至心中煩不得卧則熱氣內動盡入血中而諸陰蒙其害矣蓋陽經之寒變則熱歸於氣或入于血陰經之寒變則熱入於血而不歸于氣此余歷試之驗也故用黃連黃芩之苦合阿膠芍藥鷄子黃之甘併入血中以生陰氣而除邪熱成氏所謂陽有餘以苦除之陰不足以甘補之是也

黃連阿膠湯方

黃連四兩 黃芩一兩 芍藥二兩 阿膠三兩 鷄子黃二枚

右五味以水五升先煮三物取二升去滓內阿膠烱盡小冷內鷄子黃攪令相得溫服七合日三服

少陰病四逆其人或咳或悸或小便不利或腹中痛或泄利下重者四逆散主之

四逆四肢冷逆也此非熱厥亦太陽初受寒邪未鬱為熱而便入少陰之證少陰為三陰之樞猶少陽為三陽之樞也其進而入則在陰退而出則就陽邪氣居之有可進可退時上時下之勢故其為病有或咳或悸或小便不利或腹中痛或泄利下重之證夫邪在外者可引而散之在內者可下而去之其在外內之間者則和解而分消之分消者半從外半從內之謂也故用柴胡之辛揚之使從外出枳實之苦抑之使其內消而其所以能內能外者則樞機之用為多故必以芍藥之酸益其陰甘草之甘養其陽曰四逆者因其所治之病而命之名耳而其制方大意亦與小柴胡相似四逆之柴胡枳實猶小柴胡黃芩也四逆之芍藥甘草猶小柴胡之人參甘草也且枳實兼擅滌飲之長甘芍亦備營衛兩和之任特以為病有陰陽之異故用藥亦分氣血之殊而其輔正逐邪和解表裏則兩方如一方也舊謂此為治熱深發厥之藥非是夫果熱深發厥則屬厥應下之之例矣豈此藥所能治哉

四逆散方

柴胡 枳實破水漬炙乾 芍藥 甘草炙

右四味各十分搗篩白飲和服方寸七日三服

欬者加五味子乾薑各五分并主下利

成氏曰肺寒氣逆則欬五味子之酸收逆氣乾薑之散辛肺寒并主下利者肺與大腸為表裏上欬下利治則頗同

悸者加桂枝五分

悸者寒多心脈不通則心下鼓也桂枝辛溫入心通陽氣

小便不利者加茯苓五分

小便不利水聚於下也茯苓甘淡利竅滲水

腹中痛者加附子一枚炮令折

腹中痛寒勝于裏也附子辛溫散寒止痛

泄利下重者先以水五升煮薤白三升煮取三升去滓以散三方寸匕內湯中煮取一升半分溫再服

泄利下重寒滯于下也薤白辛溫散寒通陽氣

少陰病下利六七日欬而嘔渴心煩不得眠者猪苓湯主之

少陰中寒下利至六七日寒變為熱而氣復上行為欬為嘔為渴為心煩不得眠所謂下行極而上也夫邪氣自下而上者仍須從下引而出之猪苓茯苓澤瀉滑石並甘淡下行之藥足勝導水泄熱之用然以陰病而屬邪熱設非得阿膠之鹹寒入陰何以馭諸陽藥而泄陰中之熱導浮上之氣哉



少陰病下利咽痛胸滿心煩者猪膚湯主之

少陰之脈從腎上貫肝膈入肺中循喉嚨其支別者從肺出絡心注胸中陽邪傳入少陰下為泄利上為咽痛胸滿心煩熱氣充斥脈中不特泄傷本藏之氣亦且消燦心肺之陰矣猪水畜而膚甘寒其氣味先入少陰益陰除客熱止咽痛故為君加白蜜之甘以緩急潤以除燥而煩滿愈白粉之甘能補中溫能養藏而泄利止矣

猪膚湯方

猪膚一觔以水一斗煮取五升去滓加白蜜一升白粉五合熬香和相得溫分六服

少陰病咽中傷生瘡不能語言聲不出者苦酒湯主之

少陰熱氣隨經上冲咽傷生瘡不能語言音聲不出東垣所謂少陰邪入于裏上接於心與火俱化而尅金也故與半夏之辛以散結熱止咽痛鷄子白甘寒入肺清熱氣通聲音苦酒苦酸消瘡腫散邪毒也

苦酒湯方

半夏十四枚洗破如棗核大 鷄子一枚去黃內上苦酒著鷄子殼中內半夏著苦酒中以鷄子殼置刀環中安火上令三沸去滓少少含嚥之不瘥更作三劑服

之

少陰病二三日咽痛者可與甘草湯不差者與桔梗湯

此亦熱傳少陰而上為咽痛之法甘草湯甘以緩急寒以除熱也其甚而不瘳者則必以辛發之而以甘緩之甘草桔梗甘辛合用而甘勝于辛治陰虛客熱其法輕重當如是耳

甘草湯方

甘草二兩以水三升煮取一升半去滓溫服七合日二服

桔梗湯方

桔梗一兩 甘草二兩

右二味以水二升煮取一升去滓分溫再服

少陰病咽中痛半夏散及湯主之

少陰咽痛甘不能緩者必以辛散之寒不能除者必以溫發之蓋少陰客邪鬱聚咽嗑之間既不得出復不得入設以寒治則聚益甚投以辛溫則鬱反通內經微者逆之甚者從之之意也半夏散及湯甘辛合用而辛勝於甘其氣又溫不特能解客寒之氣亦能劫散咽嗑鬱之熱也

半夏散及湯方

半夏洗

桂枝去皮

甘草炙各等分

已上三味各別搗篩已合治之白飲和服方寸匕日三服若不能散服者以水一升煎七沸內散兩方寸匕更煎三沸下火令小冷少少嚥之

少陰下法三條

少陰病得之二三日口燥咽乾者急下之宜大承氣湯

此少陰熱併陽明之證二三日為病未久而便口燥咽乾熱氣盛而陰氣少矣蓋陽明土水少陰熱併陽明則土實而水虛不特熱氣傷陰即土氣亦傷水也故宜急下以瀉土而全水不然熱盛傷陰土實亦傷陰其乾槁可立而待然非心下痛腹脹不大便如下二條所云亦未可以大承氣輕試也

少陰病自利清水色純青心下必痛口乾燥者急下之宜大承氣湯

此亦少陰熱併陽明而氣復下注之證然雖下注而邪實不去但水液從旁下轉為自利清水而已故心下痛而口乾燥也色純青者土受水邪玄黃合色而色轉純青也以大承氣急下則胃實去而腎病亦已矣

少陰病六七日腹脹不大便者急下之宜大承氣湯

腹脹不大便土實之徵也土實則水乾故非急下不可夫陽明居中土也萬物所歸故無論三陽三陰其邪皆得遂入于胃而成可下之證然太陰傳陽明臟邪遂府為欲愈也厥陰傳陽明者水邪歸土不能復木也惟少陰則腎邪入胃而胃實

復將消腎故雖並用下法而少陰之法視太陰厥陰為加峻矣

少陰溫法十五條

少陰病始得之反發熱脈沉者麻黃附子細辛湯主之

此寒中少陰之經而復外連太陽之證以少陰與太陽為表裏其氣相通故也少陰始得本無熱而外連太陽則反發熱陽病脈當浮而仍繫少陰則脈不浮而沉故與附子細辛湯溫少陰之經麻黃兼發太陽之表乃少陰經溫經散寒表裏兼治之法也

麻黃附子細辛湯方

麻黃二兩 附子一枚炮去皮破八片 細辛二兩

右二味以水一斗先煮麻黃減二升去上沫內諸藥煮取三升去滓溫服一升

日三服

按陽證有在經不在府者陰病亦有在經不在藏者太陽篇云脈浮者桂枝湯少陰篇始得之反發熱脈沉者麻黃附子細辛湯及得之二三日麻黃附子甘草湯厥陰篇厥陰中風脈微浮為欲愈此皆陰病之在經而未入於藏者

少陰病得之二三日麻黃附子甘草湯微發汗以二三日無裏證故微發汗也

少陰中寒二三日為脈沉惡寒無熱之時故可與麻黃附子甘草湯以取微汗而散寒

邪無裏證者無吐利心煩不得卧等證也以二三日病未入藏而寒亦未變熱故得用溫經散邪之法如麻黃附子細辛之例然去細辛之辛而加甘草之甘下法為較和矣所以然者寒邪不可不發而陰病又不可過發耳

麻黃附子甘草湯方

麻黃二兩去節 附子一枚炮去皮 甘草二兩炙

右三味以水七升先煮麻黃一二沸去上沫內諸藥取三升去滓溫服一升日

三服

少陰病得之一二日口中和其背惡寒者當灸之附子湯主之

口中和者不燥不渴為裏無熱也背惡寒者背為陽而陰乘之不能通于外也陽不通故當灸之以通陽痺陽不足故主附子湯以補陽虛非如麻黃附子細辛之屬徒以溫散為事矣此陽虛受寒而虛甚於寒者之治法也

按元和紀用經云少陰中寒而背惡寒者口中則和陽明受熱而背惡寒者則口燥而心煩一為陰寒下乘陽氣受傷一為陽熱入裏津液不足是以背惡寒雖同而口中和與燥則異此辨證之要也

附子湯方

附子二枚炮去皮破八片 茯苓 芍藥各三兩 人參二兩 白朮四兩